



ATASSUT

Steen Lynge

UPA 2016/122

04. 05. 2016

Inatsisartut aalajangiiffigisassaattut siunnersuut, Naalakkersuisut peqquneqassasut kingusin-nerpaamik juni 2016-ip ingerlanerani Inatsisartuni partiit isumaqatiginiareerlugit saqqummiutissagaat, innuttaasut inuunermut ulorianaaateqarsinnaasunik nappaateqartunut ilaquaasut 2017-imiit Danmarkimi napparsimasut angerlarsimaffianni akeqanngitsumik najugaqarsinnaa- nissaannut aqqutissiuussissallutik.

(Inatsisartunut ilaasortaq, Mimi Karlsen, Inuit Ataqatigiit)

Atassut-mit siunnersuuteqartoq Mimi Karlsen, Inuit Ataqatigiit siunnersuutanut qujalluta ima oqaaseqaateqassaagut.

Atassut-mit isumaqarpugut nunatsinni - nunarsuarmioqatitsinnut sanilliukkutta – peqqissutsikkut aaqqissuussaanikkut aaqqissuisimaanerput pitsasumik inisisimanera siulliullugu taasariaqartoq.

Naak nunatsinni inoqarfiiit amerlanerisa aammalu innuttaasut ikissusaat amerlasuutigut aaqissuussaanikkut unammillernaraluartoq, oqaatigisariaqarparput peqqinnissaqarfik tunngaviatigut pitsasumik aaqqissuussaanera taasariaqartoq.

Inuk napparsimaleruni akeqanngitsumik peqqinnissaqarfimmit ikiorserneqartarpooq aammalu nunatsinni ikiorserneqarsinnaanngikkaangami, taava nunatta avataanut suliaritikkiartornissaa neqeroorutaasarluni.

Aap Atassut-mit ilisimaaraarput innuttaasunit akornanni ulluinnarni peqqinnissaqarfimmi misilitakkat ilaatigut apeqquserneqartartut. Tamanna aamma amerlasuutigut tunngavissaqartarpooq.

Taamatullu oqareerluta taasariaqarparput, Atassut-mit isumaqartuaratta innutaasut aammalu peqqinnissaqarfiup akornanni paaseqatigiinnissap pitsasumik aammalu ataavartumik pisariaqarnera. Tamannalu oqaloqatigiinnerit aammalu paasitsiniaanerit atorlugit anguneqarsinnaammatt.

Taamaaliornikkut innuttaasut aammalu peqqinnissaqarfiup akornanni suut peqqinnissaqarfimmit ilimagineqarsinnaanerannik aammalu suut pitsanngorsarneqarsinnaanerannik paaseqatigiinnissutigineqarnerat anguneqarsinnaammatt.

Inuk qitiutillugu pisortaniit sullinneqartarnissaa Atassut-mit pingaartitaraarput.

Inuiattut pingaartitaraarput innutaasut pisariaqartitsiffiini pitsasumik aammalu akeqanngitsumik ikorsiinissamik tunniussaqarsinnaanissarput.

Inuk sakkortuumik napparsimalersimasup inuunerup unammillernartuata annertunerpaaffianilarsarpoq. avatangiisiminillu ikiorserneqarnissaminik annertuumik pisariaqartitsilarsarluni.

Inuup pitsaasumik aammalu pilertortumik peqqissiaartulernissaanut tunngaviliisut pingaarluinnartut ilagaat napparsimasup iqanigisaminit tapersorsorneqarnissaa. Napparsimalersimasoq nunatta avataanut aallarunneqartariaqartoq nunatta avataaniinnermini kultur-i allarluinnaq napparsimanermi saniatigut unammillernartutut misisarsinnaasarpaa. Tamannalu tunngavigalugu pisariaqartittarpaa qanigisaminit najorneqarsinnaaneq.

Taamaammat siunnersuuteqartoq qutsavigissavarput matumuunalu oqaatigalugu siunnersuutaa tunngaviatigut Atassut-mit tapersoratsiguk.

Taamaattorli Naalakkersuisut tapersiigaluarlutik allannguutissamik saqqummiippu. Naalakkersuisut siunnersuutaata imaraa innuttaasut assigiimmik periarfissinneqarnissaat.

Naalakkersuisut siunnersuutaanni inuit napparsimasunutt - nappaataasa suuneri aallaaviginagit -nunatta avataanut aallarunneqartariaqartut tamarmik napparsimasut angerlarsimaffianni periarfissaqaraangat - ilaquaasoq akeqanngitsumik najugaqarsinnaalissaq.

Atassut-mit Naalakkersuisut allannguutissatut siunnersuutaat tapersorlugu nalunaarutigissavarput. Ataatsimiitsitaliamut susassaqartumut ingerlaqqinnissaa innersuusutigissavarput.

Qujanaq